

LESSON 10

*March 2 – 8

A Beisa Hun pan Pilnate



SABBATH NITAAK

Tu Kaalsung Simding: *Late 78; 105; Gal. 3:29; Late 106; 80; Gam. 6:22–27; Late 135.*

Kamngah: “*Ipu i pate in hong gensa, eite in i zaksa leh i theihsa, tanglai a thuthukte kahong genkhia ding hi. Hih thute, i tate tungah eite in imlo in a hong piang lai ding khang thakte tungah Topa’ minthang nasepna, ama’ vangliatna ama sepsa nalamdangte i gen ding hi*” (*Late 78:3, 4*).

Late bu sungah Pasian phatna a tuamtuan kimu thei hi. Tua thute in a vanglian Topa hong hotkhiatna a pulaak uh hi. Hih bang Late “hotkhiatna Late” ahihkeileh “Pasian nasepna pulaak Late” ci-in kimin vawh hi. Tua thute kim khat in Pasian mite tungah thuumna nei-in a beisa thute ngaihsunin Topa deihna kantel a Ama deihna bangin a nungta ding sapna Late hi. Late kimkhat in tua bangin Pasian phatna late tungtawnin a lamdang Pasian nasepnate hangin Topa muang zawk ding hong kal hi. Ama hong hotkhiatna thu hangin Topa tungah citak ding sapna kimu thei hi. Tua bang Late in a beisa hunin Pasian in a mite a huhna, amaute thuak gimnate panin a hothiatna thute tungtawnin mailam hun a gimnate tungah zawhna ngah thei ding, cih khamuanna a hong guan hi. Tua bangin Khrih tungtawnin eite khempeuh in Pasian innkuwan sungah kihelkha mite ihi hi (*Rom 8:15; 9:24–26; Gal. 4:6, 7*). Tua bangin nidang Israelte tuah thute in i thu zuihnah lam honglak thute hi. Tua ahih manin a beisa hun a thupiangte panin i nuntakpih ding thu hong hilh uh hi. A tawpna-ah khang khat panin khang khat a nungta Pasian mite in kidona lianpi sungah Pasian deihnate a pulaak uh hi.

*March 9, Sabbath a ding kiginkholhna in tu kaal lesson sim in.

Topa' tungah Tatsatlo-in Cihtakna

Simin, Late 78. Bang thute kipulaak hiam? Asaph tung panin bang thute nuntakpih ding thu honghilh hiam?

A beisa-in Israel mite cihtaklohma le cihtaknate kimu thei hi. Tua thute in khang khat khit khangah a nungta Pasian mite tha a hong guan thute hi. Amaute khialhnate pelhin Topa thuciam tungah citak ding hong hanthawn thute hi, ci-in i thei hi. Late gelhpa in thu gentehna tawh thuhilhna tampi nei hi (*Late 78:2*). Late hong hilh thute ngaihsunin i nuntakpih ding thute i zon ding hong hilh hi. *Late 78:2* in Zeisu in thu gentehna tawh thuhilh ding hi, cih genkhol ahihna kimu thei hi (*Matt. 13:34, 35*).

Late in Egypt gam panin paikhiatna thute a pulaak hi (*Late 78:9–54*), Kanaan gam a luahna uh zong a pulaak hi (*Late 78:55–64*); David hunlai thupiangte zong honghilh hi (*Late 78:65–72*). Late in Topa hoihna, Ama nasepnate le Israelte in Topa tawh thuciam a palsatna hangun a tuahkhak thute zong honghilh hi; a diakdiakin a nungta Pasian nusia-in milim tuamtuam bia-in a om uh ciangin amaute thuak thute zong kimu thei hi (*Late 78:58*). Late in Israel mite cihtak lohna phungpi lim gen mahmah hi; amaute tunga Pasian sepnate amaute in a mangngilh uh hi. Pasian muang lo-in Pasian a zia-et uh hi (*Late 78:18, 41, 56*); a thupiakte zuilo-in Ama thuciam le Ama tec i pannate a nawlkhin uh hi (*Late 78:10, 37, 56*). Tua bangin citak lohnate kipulaakna-ah Late gelhpa in Israelte in, Topa a muanlahnate in Ama tawh kigamla-in nuntakna a tung uh hi (*Late 78:7, 8*). Late i sim ciangin mihingte ngawng khuahna le vantung thute muh theih lohna, thu zuihna le thu upna-ah mittaw bangin nuntaknate kimu thei hi; Topa in hehpihna tawh kidimin lungduai-in a mite mawhna hong maisak ahihna thu zong kimu thei hi.

Koi bangin tuhun khang thakte in a hong kihilh thute mang theilo hiding hiam? A beisa huna mite mawhsakna tawh kidim sangin ei le ei kisittel ding kisam zaw hi. Pasian bawl na lamdangte phawk lo-in a thuciamna hong kalh thute phawk lo-in na nungta hiam? Gamtat hoihnatle muan le suanin koih loh ding Late in honghilh phapha hi. Tawm vei sung bek kimang mihing hoihna sangin *Late 73* honghilh bangin, Pasian citakna le Ama hehpihna kip le muanin i neih zawk ding kisam hilo hiam? Pasian mite lawhsapnate (*Late 78:9, 62–64*) le Topa tungah citak lohnate in a tawpna-ah supna lianpi hong tun ding hilo hiam? A beisa na khialhnate panin bang thute na mu khia hiam?

Abeisa Thute Phawkin Pasian min Phat

Simin, Late 105. Pasian nasepnate le tua honghilh thute Late sungah tampi kipulaak hi.

Late 105 in Topa le a mi Israelte kikalab thuciamna thute pulaak hi. Hih in Pasian in Abraham tawh a bawl thuciam siksan hi; tua thuciamah Topa in a mite Khapsa Gam tunpih ding ahinhna pulaak hi. Koi bangin hih thuciam Isaac le Jacob tungah kipulaakkik hiam? Joseph, Moses le Aaron tungtawnin Kanaan luahna tungtawnin tua thuciam in a tangtung hi. Late in Pasian mite tungah lametna thu a pulaak hi. Bang hang hiam cihleh a beisa hun a Pasian nasepna lamdangte in mailam hunah zong Pasian in hong ompih ding ahinhna hong hilh uh hi; Pasian hong itna in kikhel ngei lo ahinhna honghilh hi (*Late 105:1–5, 7, 8*). *Late 105* in *Late 78* pulaak thute mah a pulaak hi. Pasian in a mite tungah a sepna khempeuh in Ama minthan nading hi. Ama tungah citak ding hong tawsawn hi. Ahi zongin *Late 78; 105* in a beisa-a amaute khialhnate pulaak lo hi. Hih Late in ngimna dang khat nei hi. *Late 105* in Israel mite pupate thute pulaak kikkik uh hi. Pasian makaihna le ompihnhate in Israel pupaten hamsatna lakah Topa tungah a citaknate kimu thei hi. Upna pupite in thuak zawh hatna lianpi nei uh a, Pasian tung panin thaman a ngah uh hi. Tua hi-in *Late 105* in upna pupate upna mah eite in zong upna a nei bek tham lo-in Pasian hotkhatna ngakin i om hi.

Late 105 in Pasian phatna la hi (*Late 105:1–7*); hih La in Pasian phat ding hong hilh hi. Pasian mite in amau tangthu a theih ding uh kisam hi. Tangthu in thu upna in thuman thutak ahinhna le Pasian min i phat ding a hang thute zong hong hilh hi. Biakpiakna a pia mi in Abraham le Jacob suan le khakte in (*Late 105:6*); Pasian in Abraham tungah – minam lianin kong bawl ding hi, cih thuciam a tangtunna a pulaak hi; (*Pian.15:3–6*). Late gelhpa in upna pupite le amau suan le khak thu-um Pasian mite kikalab kizopna zong a pulaak hi. Late gelhpa in “Pasian in leitung mun khempeuhah thukhen ahinhna thu hong hilh hi (*Late 105:7*); biakpiakna a piate in “i Pasian” mangngilh uh hi. Amah in Topa hi-in na khempeuh tungah ukna nei hi; Ama itna in mi khempeuh tungah hong tung hi (*Late 96:1; 97:1*). A khang akhangin thu-um mite tungah cihtak ding sapna hi, ci-in kitel takin hong hilh hi.

Koi bangin Seventh-day Adventist thu-um mi khat hihna tawh Abraham suan le khak ihhlam kimu thei hiam? (*Gal. 3:29*). Hih thu piang panin bang thu nuntakpih ding om hiam?

Tangthu phawkna le Mawh kisikna

Simin, Late 106. Hih Late in bang thupiang pulaakin, tua thu piang panin bang thu nuntakpih ding i hiam?

Late 106 in Israelte nuntakna sungah Paikhiatna thu a kipan thu piang lianpite pulaak hi; sehnel gam sung khualzinna le Kanaan gam sung nuntak khuasakna thute kimu hi. Hih thute in upna pate mawhna kihhuai-na hangin namdangte gamah saltangin a om uh hi. Late in Israelte in Babylon gamah saltangin a om sung ahihkeileh saltanna pan a ciahkik hun sungin kigelh hi ding hi, ci-in kiciamteh hi. Pasian mite tuah khak thute le amaute nuntak khuasakna panin eite nuntak pihding thute hi. Lai Siangtho bu dangte bangin Late in Pasian citakna le hehpihna tawh thuciamna tungah citakna thute hong hilh hi. Tua hehpihna thuciam tawh hotkhiatna a ngah thei ihi hi (*Late 106:45*). Late bu in mawh kisikte tungah Pasian in maipha piakik ding ahihna banah namdangte lak panin kaikhawm ding ahihna thu a pulaak hi (*Late 106:47*). Tuhun leitung panin hotkhiat ding i lunggulh in ut thu mawkmawk hilo hi. Ahizongin upna tawh thungetna hi; hotkhiatna hangin Pasian tungah khamuanna ngahna hi (*Late 106:1–3*); Pasian cihtakna in a mite tawh a thuciamna-ah kimu thei hi. *Late 106* in lawpsapna thute pulaak bekthamlo-in a mawhnate uh kisikin mawhmai ding thuumna zong a nei uh hi. Tuhun khang thakte in i pu i pate sangin sia zaw tham ahihna uh kithei uh hi. Bang hang hiam cihleh a pu a pate uh mawhna hangin tu-in amaute in gim a thuak uh hi. Pasian in bangci bangin amaute tungah lungduai-in hehpihna hangin amaute in siatna sungah nungta uh himah taleh Topa in amaute a honkhia veve hi. Israelte in tua bangin kiphawk theihna nei uh ahihleh tu-in eite in mawhna kisik ding kisam mahmah ihihna phawkhuai zaw kan loding hiam? Banghang hiam cihleh Pasian zia le tong hong kilangh khinzo a, Zeisu sungah hehpihna zong hong kipulaak khin hi; singlamteh tungah mawhna thaman a hong thuak khin hi. *Late 106* thupuak in lungdam huai thu hi-in, Pasian hong itna in mawhnei mite tawh hong om khawm den ahihna, mawhna tungah itna kicing zaw tham hi (*Late 106:8–10, 30, 43–46*).

Late 106:13 sim in. “Ahih hangin amaute in ama nasepte mangngilh pah uh a, ama thugen ding ngak loin a gamta pah uh hi.” Bang hangin tua bangin i nuntakna ol takin hong tung thei hi ding hiam?

Topa' Lenggui Thugentehna

Simin, Late 80. Koi bangin Pasian mite kipulaak hiam? Bang lametna nei dingin thuumna kimu thei hiam?

Israel in Egypt gam panin a kizung bawh leenggui tawh kigenteh hi; tua kinengniamna gam panin cihtheihna tawh a kidim Khapsa Gam ah a kipaipih hi. Leenggah huan limciinna in Pasian in Israel minamte teltuam aihna le amaute kitangsapna khempeuh a sik a piakna thu honghilh hi (*Pian. 49:11, 12, 22; Thkna. 7:7–11*). Tua hi-in *Late 80* in Pasian leenggah huan tungah Ama hehna hong tung hi (*Late 80:12*). Kamsangte in leenggah huan kisiatna in Pasian thukhenna thuak aihna pulaak uh hi. Banghang hiam cihleh tua leenggah huan in kisiacip hi (*Isa. 5:1–7, Jer. 2:21*). *Late 80* sungah bang thu hangin Pasian in thukhen cih a pulaakna kimu lo hi. Tua bangin hehpihna tawh kidim Pasian in Ama ompihna dawkkhia thei aihna thu zong a pulaak hi. Pasian hehna le Ama thukhenna in kinungngat hi. A lang khatah Pasian hehpihna le mawhMaisakna hangin Late in Pasian hehna lauhuai-na thu zong a pulaak hi. Pasian hehna in minamte a beimangsak thei hi (*Late 80:16*).

Simin, Gam. 6:22–27. Koi bangin *Late 80* in pulaakkik hiam?

Late gelhpa in Aaron tunga Pasian in a kamciamte a pulaak hi (*Gam. 6:22–27*); a gen bulpi bel in mihingte in gimna sungah nungta himah taleh Pasian hehpihna in tua thute tungah zawkha ngah ding hi, ci-in lametna lianpi kipulaak hi. “Topa aw, hong bawlpha in; na maipha hong tan inla kote hong honkhia in” (*Late 80:3; 80:7, 19*). Hebrew tawh kigelhna-ah “Bawlpha” cih kammal in “ciahkik” cih kammal panin hong pai hi. Hih kammal in Pasian in a mite samin Ama kiang zuankik dingin a hong sapna kammal hi-in Lai Siangtho sungah zong mun tampi-ah kimu thei hi. A mite in Ama kiang panin paikhia-in Amah tawh kigamla khin ahih manin Ama kiang zuankik dingin sapna hi. Mawha nusia-in Pa Pasian kiang zuankik a nuntak khuasakna hong hilh hi.” “Amaute tungah lungtang thak ka pia ding a, Keima in Topa ka hihna a thei ding uh hi; amaute in Keima mi hi ding a, Keima in amaute Topa ka hi ding hi; amaute Pasian ka hi ding hi.” Bang hang hiam cihleh amaute in a lungsim khempeuh uh tawh kei kiang hong zuankik ding uh hi” (*Jer. 24:7*).

Koi bangin mawh kisikin Topa kiang na zuankik hiam?

THURSDAY

March 7

Leitung ah a Sang penpen Ukna nei Topa

Simin, Late 135. Late in bang thupiangte pulaak hiam? Late gelh pa in tua thute panin bang thu nuntakpih hiam?

Late 135 in Pasian mite in Topa hoihna, a piensak nate tungah a citaknate hangin Ama min phat dingin hongsam hi (*Late 135:6, 7*); tua banah Pasian in Israelte mitte tungah cihtakin sultan Egypt gam panin suahtakna pia bektham lo-in (*Late 135:8, 9*); Khapsa gam luah dingin a galte tungah zawhna a pia hi (*Late 135:10–12*). Topa in Ama hehpihna tawh Israel minamte Ama neih tawntung dingin a manpha mi nam dingin a teeltuam hi (*Late 135:4*). “A tuam vilvelin a manpha go le gamh” ahi dingin Topa in a teel minam ahih bangmah un Topa le a mite kikaal a thuciamna a pulaak hi (*Thkna. 7:6–11; 1Pet. 2:9,10*). Israel mite in namdangte sangin hoih zawkna, minphat zawkna bangmah nei tuanlo uh hi. *Late 135:6, 7* pulaak bangin Topa in leitung na khempeuh tungah Ama geelnate a pulaak hi. Pasian in a mite adingin na lianpite a sepsaknate pulaak ding hong deih hi. Pasian in a mite tungah thukhen ding ahihna le amaute tungah lai-natna nei ahihna zong kimu thei hi (*Late 135:14*). Hih thu-ah thukhenna in Pasian in a kinengniam mite honkhia-in lawhsam mite a domkang hi (*Late 9:4; 7:8; 54:1; Dan. 7:22*). Topa in a mite tawisangin a galte khut panin amaute dalin hu hi (*Thkna. 32:36*). *Late 135* in Pasian mite in Ama tungah muanna nei-in a thuciam tungah citak ding uh hi. Topa in a mite tungah a cihtakna in Late gelhpa in milimte biakna in a mawkna hi, ci-in theihtelna a guan thak hi. Bekthamlo-in Topa in na khempeuh tungah ukna nei-in na khempeuh in Ama makaihna nuai-ah om uh hi (*Late 135:15–18*). Milimte tungah kingakna in lametna hong pia theilo, bangmah sem theilo, hong huh theilo hi. Tua bangin milim a biate in a biak uh milimte bang mahin kimanna a nei kei uh hi (*Late 135:18*). Late in Pasian in Piangsakpa le a mite a Honkhiapa ahih manin biak thamcing phat taakcing hi, cih honghilh hi. Thukham (4) na tawh kisai thu nihte in tonkhawm ahihna kimu thei hi (*Pai. 20:8–11, Thkna. 5:12–15*). Pasian vangliatna in piensaknate tungtawn in le leitung thupiangte tungtawnin hong kilangh hi. Hih thunihte in ziat le vei bangin a tonkhawm uh hi. Piangsakpa ahihna le eite Honpa ahihna hangin Amah bek mah in biaktaakcing hi.

Koi bangin i nuntakna sungah milim biakna tawh kipelh thei ding i hiam? Bang hangin milim biakna sung kitung kha zel hiam?

Ngaihsutbeh Ding: *Sawl. 7; Heb. 11 simin. Thukhun Thak in Pasian ukna in a tawpna-ah bang dinmun hong tunpih ding hi, ci-in pulaak hiam?*

Late bu sung a kipulaak tatkhiatna thupiangte in Pasian in amite tungah a citakna thute kimu thei hi. Thupiang khatpeuh in Pasian mite tungah Ama ompihna le leitung Honpa hong khang ding ahihna kamciamte a tangtunna zong kimu thei hi. Hih kamciam in Nazareth khua mi Zeisu nunzia tungtawn in tangtung ahihna kimu thei hi. Late gelhpa in Pasian mite in Topa tungah citaklo uh himah taleh amaute'n upna panin lampial tuanlo uh hi; Pasian kamciamte tangtung ahihna mu thei uh hi. Amaute nunzia in tuhun mite tungah thuhilhna lianpi a suak hi; Pasian a langpan mi in kisiatna a thuak ding hi. Pasian tate in Topa sungah lametna a nei thei lai uh hi. “Eite in a beisa hun a Topa hong makaihnate i mangngilh kei nakleh mailam hun a ding bangmah patauh ding omlo hi.”—Ellen G. White, *Life Sketches of Ellen G. White*, p. 196.

Pasian mite in lau lo-in a mainawt ding uh hi. Amaute in Pasian lamlahna, makaihnate a phawk ding kisam hi. Ellen G. White lamlahna a um ding uh hi. Kaal khatin khat vei peuhmah *Late 105 le 106 sim hamtang in.*”—*Testimonies to Ministers and Gospel Workers*, p. 98.

Pasian mite hong kihotkhiatna thu in, Pasian in a kamciam bangin nasem in tangtung ahihna kimu thei hi. Ama kamciam a tangtung lo bangmah omlo hi. Hih in Pasian kamciam le mimal khat ciat a hong kepna, Khrih nihvei hong pai ding ahihna kamciam hi. Khrih nihvei-na hong pai ciangin Pasian ukna Gam sung thutanna le leithakah dainha tawh a kidim leitung hiding hi, cih honghilh khollhna thute zong kimu thei hi.

Kikupding Dotnate:

- ① Pasian mite tungah Ama cihtaknate ngaihsun inla, A mite tungah a piak thuphate zong ngaihsun in. Tua bangin Topa cihtakna le thuphate mangngilhna hangin bang thu kithuakkha thei ding hiam? Topa hong hilh thute mangngilhna in bang dinmun hong tunpih thei ding hiam? Koi bangin tua thu guipi nuntakpih thei ding i hiam? Nidang Israelte tungah Pasian sapna a om bangin tu-in pawlpi in zong sapna ngah hilo hiam?
- ② Koi bangin Late in Pasian kepna le hong piak thuphate hong phawk sak hiam? Pasian vangliatna sungah lungduai takin ngak ding le Amah muan ding honghilh hiam?
- ③ Koi bangin mimal hitaleh mihon in biakpiaknate in Pasian hong hotkhiatna pulaak hiam? Pasian in a mite tungah a bawl thute naupang note tungah hilhsawn thei ding i hiam?